

Sunday, June 14, 2026

Time - 2:30pm - 2:35pm

**AKASHVANI AIZAWL
REGIONAL NEWS UNIT**

**REGIONAL NEWS BULLETIN
(MIDDAY)**



HEROIN HAUL

Excise & Narcotics Department, Assam Rifles leh Central Anti Drugs Squad (CADS), Central YMA thawkho chuan Heroin gram 740 an man.

Excise & Narcotics department thupuangtu Pu Peter Zohmingthanga hnen atanga thu dawn danin Excise & Narcotics Department, 34th Bn. Assam Rifles leh Central Anti Drug Squad (CADS), Central YMA-te thawkho chuan Zirtawpni zing khawvar hma dar 2:30 khan New Vervek khuaah Heroin gram 740 (Hawng 61) bakah heroin neitu a puh leh he thila inhamhnawih a puh mi 9 an man a, An mimante hi Lalramsiem (43), Andrew (30), Lalchuilou (49), Joseph (19), Lalrinchhan (36) leh Lalmalsawm (37) Lungthulian khua, Pherzawl District, Manipur te, Lalthlankung Hmar (42), Khiangbawr khua, Pherzawl District, Manipur; John Barnard (34) Sihpuikawn khua, Pherzawl District leh Lalneihlim (18) Damdei khua, Pherzawl district, Manipur te an ni.

Heroin phurhkualna atana an hman Mahindra Bolero Camper thar (Registration No. la nei lo) pawh hrensak an ni a, mi mante hi The Narcotic Drugs & Psychotropic Substances Act, 1985 (NDPS Act) Section 21(c) tlawhchhanin thubuai siamsak an ni a, Zirtawpni vek khan Special Court (NDPS Act), Aizawl-ah hruai nghal an ni.

Assam Rifles thuchhuahin a tarlan danin M4 Assault Rifle pakhat leh a mu 5.56mm pakua chu he'ng an mimante kut atang hian an man tel bawk . Silai leh a mu an mante hi Sakawrdai Police Station-ah hlan a ni a, chhui zui mek zel a ni.



TOBACCO

Population Based Cancer Registry tarlan danin vaihlo zuk leh hmuam lam chiin Mizoramah Cancer natna a thlen tam hle.

Report tihchhuah thar bera alan danin, kum 2018 atanga 2022 kum nga chhungin Cancer vei hmuhchhuah mipa 4,920 zingah vaihlo zuk leh hmuam kaihnawih avanga Cancer mi 2,291 an awm a, hmeichhe Cancer vei hmuhchhuah 4,848 ah zuk leh hmuam tih avanga Cancer mi 1,980 an awm bawk.

Zuk leh hmuam avanga Cancer natna vei mipa zingah chawkawng Cancer an tam ber a, za zela 17.9 niin, hmeichhe zingah Chuap Cancer za zela 12.2 an awm bawk a ni. Heng bakah hian Cancer natna hmeichhia-ah chuan chuap, hnute, pumpui leh chhul Cancer an tam bera kum 5 chhungin heng taksa peng natna chi li ah hian Cancer vei mi 2,038 an awm a ni.

Mipa zingah chawkawng, pumpui leh chuap Cancer mi 2,226 an awm bawk a, Mizoram population based cancer registry in a tarlan danin kum 5 chhunga cancer natna hrang hrang endikna atanga an hmuhchhuah-ah khawl Microscopic hmanga hmuhchhuah mipa 4,056 an awma, hmeichhia 3,987 an awm bawk a ni.



SHG

June ni 3 leh ni 12 inkar chhung khan Bethany Society Shillong buatsaihin USHA CLASSICAL SILAI SCHOOL TEACHERS TRAINING PROGRAMME ,Khawzawl RD Block huamchhunga Self-Help Group (SHG) member-te tan huaihawt a ni.

DPRC Khawzawl ah he training hi huaihawt a ni a, khaw hrang hrang atangin SHG member 15-te'n ni 9 chhung puanthui an zir a. June 3, khan DRDO Project Director Pu K Lalhmuakliana'n training hawna hun a hmanpui a. June 12 ahkhar ani . Hawna inkhawm hi NEIGRIHMS Shillong-a Radiology Head of Department Dr C. Daniala pawhin a hmanpui a , Certificate, USHA puanthui khawl leh Classical SILAI School Signboarda sem bawk ani. Pu Timothy R. Lalhmangaiha BDO/BMD chuan nuho fuihna thu a sawi a. He programme a hlawhtlin theih na'na hmalakpuitu CEO leh SMMU hotute chungah lawmthu a sawi bawk a ni.

Trainer ah Rilian designing studio neitu Tv. Lalduhzuala, Khawzawl hman a ni a. Khawl remkhawm dan, a thiah dan, thawmhnaw thui tur teh dan, puan zai leh nuho in an khawl mila an hman tangkai theih tur kawr design hrang hrang leh kekawr lam thui dan te an zir a. Training hun chhung a rei loh avangin a tam thei ang ber an thiam theih na'n nasa takin tan an la a, zan lamah te in lama zir zui turte inpe-in theihtawpin he ni kaw chhung hi an hmang a ni. Training a telte hi a ke khawl an dawng vek bawk a ni.



JHARKHAND LIGHTNING

Jharkhand-ah darkar 24 kalta chhung khan tek-in mi 7 a deng hlum a, an zingah hian hmeichhia 3 leh mipa naupang kum 10 mi an tel a ni.

Police sawi danin, tek den vang hian Ranchi-ah mi 2 an thi a, Garhwa dist-ah mi 2 an thi bawk a, Chatra, Giridih leh Seraikela-Kharsawan dist-ah mi 1 theuh an thi bawk a ni.

